

Partisipasyon sa Simbahan sa mga Indibidwal Nga Mikonsiderar sa Ilang Kaugalingon isip Transgender

GIYA NGA MGA BAROGANAN ALANG SA LOKAL NGA MGA LIDER

Kini nga dokumento nagsuplemento sa palisiya diha sa *Kinatibuk-ang Tamdanan nga Basahon*, 38.6.23, “Mga Indibidwal Nga Mikonsiderar sa Ilang Kaugalingon isip Transgender.” Ang katuyoan niini mao ang pagtabang sa lokal nga mga lider sa pagtambag sa mga indibidwal ug sa ilang mga pamilya mahitungod sa pipila ka aspeto sa partisipasyon sa Simbahan.

Kinatibuk-ang mga Lagda

Sa tanang kahimtang, ang lokal nga mga lider:

- Magtinguha og espirituhanong giya.
- Motratar sa mga indibidwal ug sa ilang mga pamilya nga adunay gugma ug pagtahod samtang nagtudlo og kamatuoran sa ebanghelyo.
- Mokonsiderar sa mga panginahanglan sa mga indibidwal ug sa ubang mga sakop sa ward.
- Moseguro nga ang doktrina sa Simbahan bahin sa kinatawhan [gender] dili mapahuyang o masayop sa pagsabot.
- Magtinguha og tambag. Ang mga bishop magpakitambag sa presidente sa stake. Ang mga presidente sa stake ug mga presidente sa misyon magtinguha og giya gikan sa Kapangulohan sa Area.
- Molambigit sa mga ginikanan o mga tigbantay sa mga menor de edad.

Gustong Itawag nga mga Ngalan o mga Pulingalan [Pronouns]

Ang opisyal nga mga rekord sa Simbahan nagpakita sa biyolohikanhong sekso nga natawhan.

Ang paggamit sa gustong itawag nga mga ngalan o mga pulingalan kinahanglan nga mahimong usa ka butang nga isalig sa mga indibidwal ug sa ilang pamilya, mga higala, ug mga miyembro sa Simbahan. Ang lokal nga mga lider kinahanglan dili motino o mosugo kon sa unsang paagi ang mga miyembro motawag sa usa ka indibidwal.

Kon ang usa ka miyembro adunay gustong itawag nga ngalan, mahimong ipaila kini diha sa “Gustong Itawag nga Ngalan” nga field diha sa rekord sa pagkamiyembro.

Mga Miting ug mga Kalihokan nga Piho sa Kinatawhan

Ang mga indibidwal motambong sa mga miting ug mga kalihokan nga piho sa kinatawhan nga nahiuyon sa ilang biyolohikanhong sekso nga natawhan.

Ang bisan unsa nga mga eksepsiyon, nga talagsa ra gayod kaayo, kinahanglang mosunod sa “Kinatibuk-ang mga Lagda” nga gilista sa ibabaw ug maaprobahan sa Kapangulohan sa Area.

Tibuok Gabii nga mga Kalihokan

Alang sa tibuok gabii nga mga kalihokan nga alang sa usa ka piho nga kinatawhan, ang mga indibidwal motambong lamang sa mga kamping nga nahiuyon sa ilang biyolohikanhong sekso nga natawhan. Mga ehemplo sa maong mga kalihokan naglakip sa mga kamping sa Young Women ug mga kamping sa korum sa Aaronic nga Pagkapari.

Alang sa tibuok gabii nga mga kalihokan nga dili alang sa usa ka piho nga kinatawhan, ang mga indibidwal nga mohimo og mga kausaban pinaagi sa pagpaopera, medikal, o sosyal nga pagtransisyon ngadto sa kaatbang nga biyolohikanhong sekso nga natawhan mobiya sa kalihokan inig ka gabii. Ang kabatan-onan itugyan ngadto sa pag-atiman sa usa ka ginikanan o legal nga tigbantay, kinsa responsable sa paghan-ay sa mga makatulgan. Mga ehemplo sa mga kalihokan nga dili alang sa usa ka piho nga kinatawhan naglakip sa mga komperensiya sa young single adult, mga Komperensiya Alang sa Kalig-on sa mga Kabatan-onan, ug mga komperensiya sa kabatan-onan.

Mga Calling ug mga Buluhaton

Ang mga indibidwal nga mohimo og mga kausaban pinaagi sa pagpaopera, medikal, o sosyal nga pagtransisyon ngadto sa kaatbang nga biyolohikanhong sekso nga natawhan dili tawagon o sangonan sa (1) pagtuman sa mga tahas nga piho sa kinatawhan, (2) pagserbisyo isip mga magtutudlo, o (3) pagpakigtambayayong uban sa kabataan o kabatan-onan. Mahimo silang modawat og ubang mga calling o mga buluhaton nga maghatag og mga oportunidad nga mouswag ug moserbisyo sa uban.

Mga Banyo diha sa mga Pasilidad sa Simbahan

Ang mga banyo kinahanglang maghatag og pribado ug luwas nga palibot. Kinahanglang himoon ang pag-amping aron sa pagtahod sa pagkapribado ug dignidad sa tanang indibidwal.

Ang mga indibidwal nga mohimo og mga kausaban pinaagi sa pagpaopera, medikal, o sosyal nga pagtransisyon ngadto sa kaatbang nga biyolohikanhong sekso nga natawhan kinahanglang mogamit og banyo nga usa ra ang makagamit kon anaa.

Kon walay banyo nga usa ra ang makagamit, ang usa ka lokal nga lider makigtambag sa indibidwal (ug sa mga ginikanan o mga tigbantay sa usa ka batan-on) aron sa pagpangita og solusyon. Ang mga opsiyon naglakip sa:

- Paggamit og banyo nga nahiuyon sa biyolohikanhong sekso nga natawhan sa indibidwal.
- Paggamit og banyo nga motukma sa pagbati sa indibidwal sa ilang kahaladman nga pagbati sa kinatawhan, uban sa usa ka sinaligan nga tawo nga moseguro nga ang uban wala naggamit sa banyo sa samang higayon.